

四

明

叢書

張宗祥



00
2
10

文山師承

知州朱約齋先生渙

朱渙字約齋廬陵人文信國受業師嘉定中進士任大

理寺丞知衡州文章政事名重一時

人物志

梓材謹案先生亦號約山文山集有和朱衡守約山韻下四句云競言汲薏猶須復或謂顏愚亦可如把酒對花姑勿論春行後長莫妨徐又闕山寄朱約山云先生曾有空同約那裏江山未是奇又壽朱約山入十三歲八十韻又回朱約山賀生日云鄉有達尊獲在嫡孫之行我生初度誤蒙大老之知是先生於文山爲鄉前輩未見其爲受業師也

監丞曾秀峯先生鳳

曾鳳字朝陽號秀峯文山之師也太學釋褐累遷監丞
會京師亂走衢衢尋陷及景炎登極衢添倅蕭霄龍首
倡返正先生自衢至劒隨行府之汀丁丑春以梅州添
差通判將行會行府移屯先生避地于汀之鄉落六月
以病卒

文文山集

梓材謹案先生嘗典衢教文山回其書言某數月
於師門極閒闊顧山水荒唐不自知年歲之遲遲
闕禮多矣尙庶幾先生
索之於形骸之外云

胡觀洲先生季從

胡季從號觀洲文山童子師也後與之書曰某童而習

之受業解惑有所自來惟今父族母族矜佩而立受道者七人焉將同堂合席以私淑之輒恃鉗鎚之舊爲此數字以北面請云

文山文集

王東廬先生國望

王國望號東廬先生文山之師也官從政郎袁州軍事推官景定三禩進士策御前文山覆校殿廬一日初考官舉一卷擬上乙覽會一字近廟中嫌名文山以才難白詳定官請所以處臨軒之日賜出身文山銘其母墓曰事孰爲大事親爲大守孰爲大守身爲大使先生失

身爲親憂雖高科如之何先生雖不得高科爲臣忠爲子孝身在焉親固榮也諗先生曰然

文文山集

通判陳鳳岡先生堯舉

陳堯舉南豐人淳祐中進士官至通判臨江軍營承江西運司檄考試廬陵士子拔擢文文山咸謂其知人居官甘澹泊無一毫妄取學者尊爲鳳岡先生

姓譜

附錄

文文山與書曰先生聞多而學廣事熟而心精古人重師友至有塗竄片言隻字以冀萬分益者鳴絃千室中

有老門生在焉知公不能用其翹然矣

須溪師承

王太初先生泰來

王泰來字太初廬陵人劉會孟之師也父兄俱仕宋延
賞弗及試藝屢屈晚值世變旣貧且病而詩愈工會孟
每稱其詩爲廬陵八邑之冠

吳草廬文集

曾先生子淵

曾子淵字深甫鄉城人劉辰翁年七八與西家二三兒
共受書屬對於先生見其垂髯映墨黑盡口樹筆髯閒

俯首鈔六經他解附注傍每葉字如蟻計平生若此何啻百餘萬字云

劉須溪集

附傳

縣令周衡齋先生焱

周焱吉水人寶祐進士官南昌知縣宋亡誓不復仕閉門著書以娛老有通鑑論斷四書衍義行於世

吉安府志

附錄

王義山序四書衍義曰衡齋先生取宋高第不特史學精於理學尤精也近世眞西山作中庸大學衍義而不

及論孟非若衡齋所衍爲全書也

巽齋家學

布衣歐陽先生浚

歐陽浚字資深巽齋先生之子世先生之學頽然布衣
文文山集

進士歐陽先生致遠

歐陽致遠不知其名巽齋先生從子也國子進士嘗與

信公友善
柳待制集

巽齋門人

補忠烈文文山先生天祥

雲濠謹案先生本字天祥其紀年錄正文云理宗端平三年子以五月二日子時生大父夢子騰紫雲而上命名雲孫既長朋友字曰天祥後以字貢於鄉字之者改曰履善理宗覽對策見其名曰此天之祥乃宋之瑞也朋友遂

又字之曰宋瑞而通稱之

雲濠又案先生元初諡忠武明景泰中改

諡忠烈國朝道光二十三年從祀孔廟

梓材謹案先生自幼卽慕歐陽修楊邦乂胡銓之

爲人則固文忠忠簡之私淑也又案顧問序正節

李侯褒忠錄云由唐宋而來仗節取義之士眾矣

從學問中來者二人侯與文山公是也侯從東萊

呂先生遊東萊嘗亟稱之與文山之學

淵源同也豈先生之學亦出於東萊耶

梓材又案文山壽江古心詩題云古心江先生以

舊弼出鎮長沙癸酉十月乙亥是爲七十六歲門

人文某以一節趨走部內謹擬古體一首爲壽是先生嘗及江氏之門又通江丞相書謂某在門牆諸孫輩行中則先及江氏弟子之門而後及江氏之門也又案先生祭胡石壁文有云登門何晚哭野何遽胡都承當是先生受知師

文山文集

聖人之作經也本以該天下無窮之理而常足以擬天下無窮之變天地無倪陰陽無始人情無極世故無涯千萬世在後聖人亦安能預窺逆觀事事而計之物物而察之然後世興衰治亂之故往往皆六經之所已有凡六經垂監戒以爲不可者少犯之則關安危大犯之

則決存亡是何哉聖人知有理而已

每誦一義善可以爲法卽驗之身曰吾嘗有是乎無則
勉之每說一事惡可以爲監卽揣之心曰吾嘗有是乎
有則改之言則慮其所終行則稽其所敝豈惟制治於
未亂保邦於未危充道學之用經綸天下之大經範圍
天地之化而不過

以上輪對劄子

且夫奸人之入相也使非此人者與之相爲表裏以揜
陛下之聰明密爲游揚以開陛下之信用則賢者必不
以好名中傷言者必不以譁競逐去學校之持公論者

必不以諠橫得禍士大夫之秉直節者必不以貪贓加罪朝廷清一言路光明邪人何自而赫張民瘼何自而壅隔人離而陛下何以不覺寇至而陛下何以不知彼其憑陛下恩寵以爲奸人奧主故顛倒宇宙濁亂世界而得以無忌憚使陛下今日訟過於天地負媿於祖宗結怨於人民受侮於夷狄則豈獨一奸人爲之哉原情定罪莫重於奧主而奸人次之

己未上皇帝書

天命人事常判然不相侔而前言往傳動必以天爲訓者人雖藐然萬物備於我苟爲凡民則已大之爲聖賢

秀之爲士天地民物孰非一己之責任重致遠皆性命之當然也

上丞相書

某聞古者家有塾黨有庠士生其時而爲師者非其家之父兄則其鄉之所與也是以不獨屑屑於言語文字之末而聖賢誠正脩齊之學蓋在所法焉

與孫子載書

今天下大勢所以削弱不支實坐於文物制度之密區區直欲割去繚繞使內外手輕腳便如此而後可以立國中

回聶吉甫

非有志念不足以洗冤澤物非有力量不足以懲暴詰

姦賀翁丹山兼憲

取士於天下將以爲天下用人之常情其窮也不爲利
疚則其達也不可以非義屈後之臨大節斷大事決非
異時簞食豆羹見於色者之所能也

吉州州學貢士莊記

夫在上有師道則在下有善人脩於家有正學則天子
之庭有眞儒

衡州耒陽縣進士題名記

爲臣忠爲子孝出於夫人之心內有不待學而知勉而
行者古之人行乎忠孝之實而不必以名知於人此人
道之自然也若夫處時之變遭事之不幸始有不得已

而忠孝之名歸焉則亦有可憫者矣

忠孝提綱序

陰陽大化絪縕磅礴人得之以生其爲性不出乎剛柔而變化氣質則在學力

送彭叔英序

凡道各有入處凡學各有悟處程氏以敬張氏以禮示人以從入也而游於程張氏之門者或得於靜坐或得於主一或得於去一矜字悟之不必同也凡入皆以悟凡悟皆可入

題賈端老不忘室

天下危莫危者心天下樂莫樂者心操而存之防其危優而柔之會其樂

題張德從畏心堂

乾稱進德者三而象曰天行健君子以自強不息聖人復申之曰終日乾乾行事也君子之所以進者無他法天行而已矣進者行之驗行者進之事進百里者吉行三日進千里者吉行一月地有遠行無有不至不至焉者不行也非遠罪也

題戴行可進學齋

易象雲者二一以爲君子用世之象一以爲君子樂天之象易於進退行藏之義各有攸當

跋番陽徐應明梯雲帙

命者令也天下之事至於不得不然若天實使我爲之此之謂令而自然之命也自古忠臣志士立大功業於

當世往往適相解后而計其平生有非夢想所及蓋不幸而國有大災大患不容不出身扞禦天實驅之而非夫人之所欲爲也當天下無事仕於是時者不見兵端豈非命之至順蓋至於不得已而用兵犯危涉險以身當之則命之參差爲可閔矣士大夫喜言兵非也諱言兵亦非也如以爲諱則均是臣子也彼有王事鞅掌不遑啓居至於殺身而不得避是果何辜吾獨何爲而取其便如以爲喜則是以功業爲可願鰓鰓然利天下之有變是誠何心哉是故士大夫不當以爲諱亦不當以